

BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
OPĆINSKI SUD U TEŠNJU
Broj: 39 0 K 074712 24 K
Dana: 11.06.2025. godine

U IME FEDERACIJE BIH!

Općinski sud u Tešnju, sudija Bekrić Hidajeta, uz sudjelovanje zapisničara Hidajete Mehinović, u krivičnom predmetu optuženog J.O. zv. „J.“, sin R. iz J., ul. Mostarska broj 3, općina Tešanj, zbog krivičnog djela “Neovlaštena proizvodnja i stavljanje u promet opojnih droga” iz člana 238. stav 1. Krivičnog zakona Federacije Bosne i Hercegovine, povodom optužnice Kantonalnog tužilaštva Zenica broj T04 0 KT 0049066 23 od 01.08.2024. godine, nakon održanog glavnog, usmeno i javnog pretresa, u prisutnosti tužitelja Kantonalnog tužilaštva ZE-DO kantona Ahmetlić Amre, optuženog i njegovog branioca Kesić Ratka advokata iz Teslića, dana 11.06.2025. godine, donio je sljedeću:

P R E S U D U

Optuženi J.O. zv. „J.“, sin R. i majke M. rođene R., rođen 27.05.1988. godine u D., nastanjen u T., Ulica Mostarska broj 3-J., pismen, sa završenom SSS, po zanimanju poljoprivredni tehničar, razveden, bez djece, srednjeg imovnog stanja, vojsku nije služio, ne vodi se u vojnoj evidenciji, po narodnosti Bošnjak, državljanin BiH, JMB: ..., osuđivan,

Kriv je

Što je:

Dana 29.04.2022. godine, oko 22,55 sati, u ulici Husein kapetana Gradašćevića u mjestu J., u T., suprotno odredbama člana 4 stav 1., 2., 3. i 5. u vezi sa članom 19. Zakona o sprečavanju i suzbijanju zloupotrebe opojnih droga (Službeni glasnik BiH broj 8/06), neovlašteno radi dalje prodaje držao 5 pvc paketića svijetložute praškaste materije sa sadržajem psihoaktivne supstance „amfetaminsulfat“ poznatije kao opojna droga „speed“ neto težina 0,640 grama; 0,565 grama; 0,679 grama; 69,097 grama i 73,228 grama a koja droga je pod rednim brojem 1 popisa psihotropnih tvari iz tablice II „Tvari i biljke pod strogim nadzorom“ proglašena kao takvom, 8 pvc paketića biljne materije sa sadržajem psihoaktivne supstance „tetrahidrokanabinol“ (THC) poznatije kao opojna droga „marihuana“ ukupne neto težine 179,665 grama a koja droga je pod rednim brojem 13 liste opojnih droga i rednim brojem 26 liste psihotropnih tvari iz Tablice I „Zabranjene tvari i biljke“ proglašena kao takvom, 50 tableta žutozelene boje ukupne neto težine 19,110 grama koja sadrži psihoaktivnu komponentu „metilendioksimetamfetamin“ (MDMA), poznatije kao opojna droga „ecstasy“ a koja droga je pod rednim brojem 12 popisa psihotropnih tvari iz tablice I „Zabranjene tvari i biljke“ proglašena kao takvom, a koja gore navedena opojna sredstva je dobrovoljno predao policijskim službenicima PU IV PS Tešanj prilikom zaustavljanja i kontrole vozila marke „Peugeot“ reg. oznaka K87-J-901 sa kojim se nalazio u gore navedenoj ulici,

dakle, neovlašteno radi dalje prodaje držao opojnu drogu,

čime je počinio krivično djelo Neovlašćena proizvodnja i stavljanje u promet opojnih droga iz člana 238. stav 1. Krivičnog zakona Federacije Bosne i Hercegovine, pa se na osnovu istih zakonskih odredaba čl. 43. i 49. Krivičnog zakona Federacije Bosne i Hercegovine,

OSUĐUJE

Na kaznu zatvora u trajanju od 1 (jedne) godine

Privremeno oduzeta opojna droga Speed ukupno neto mase 144,209 grama, Marihuana 179,665 grama i 50 MDMA tableta Amfetamin ukupno neto mase 19,110 grama trajno se oduzima, a količina preostala nakon vještačenja (144,012 grama, 179,286 grama i 18,356 grama) se ima uništiti.

Naređuje se Komisiji za uništenje opojne droge formirane pri Vijeću Ministara BiH da odmah po prijemu naloga za izvršenje mjere sigurnosti, a najdalje u roku od mjesec dana od PU IV PS Tešanj oduzme navedenu opojnu drogu preostalu nakon izvršenog vještačenja, te istu uništi u skladu sa Pravilnikom o čuvanju i uništenju oduzete opojne droge, psihotropnih tvari, biljaka iz kojih se može dobiti opojna droga i prekusora.

Optuženi se obavezuje na plaćanje sudskog paušala u iznosu od 100,00 KM u roku od 15 dana od dana pravosnažnosti presude.

O b r a z l o ž e n j e

Kantonalno tužilaštvo ZE-DO kantona Zenica optužnicom T04 0 KT 0049066 23 od 01.08.2024. godine optužilo je J.O. zv. „J.“, zbog krivičnog djela Neovlaštena proizvodnja stavljanje u promet opojnih droga iz člana 238. stav 1. KZ FBiH, počinjenog na način, vrijeme i mjesto kako je to pobliže opisano u optužnici, temeljeći optužbu na dokazima koji su predloženi u optužnici.

Sudija za prethodno saslušanje ovog suda potvrdio je navedenu optužnicu dana 07.08.2024. godine i zakazao ročište radi izjašnjenja o krivnji, na kojem ročištu je optuženi izjavio da poriče krivnju pa je i zakazan glavni pretres.

U toku glavnog pretresa održanog dana 11.06.2025. godine u uvodnom izlaganju optuženi je izjavio da je tačno da je u vrijeme i mjesto, na način i u količini kako je to opisano u optužnici neovlašteno posjedovao opojnu drogu radi stavljanja u promet, da se iskreno kaje i da priznaje krivnju po ovoj optužnici.

Priznanje optuženog je potpuno i u skladu sa dokazima u spisu i to: standardizirani policijski izvještaj PU IV PS Tešanj broj: F04-21-22-00631 od 29.04.2022. godine, zapisnik o uviđaju PU IV PS Tešanj broj: 08-02-11/1-1-110/22 od 29.04.2022. godine, potvrdu o privremenom oduzimanju predmeta PU IV PS Tešanj broj: 08-02-11/1-63-41/22. od 29.04.2022. godine na ime Jeterić Osman, zapisnik o izvršenoj radnji privremenog oduzimanja predmeta i popisu privremeno oduzetih predmeta PU IV PS Tešanj broj: 08-02-11/1-30/22 od 29.04.2022. godine, zapisnik o otvaranju i pregledu privremeno oduzetih predmeta i dokumentacije PU IV PS Tešanj broj: 08-02-11/1-110/22 od 20.07.2022. godine, naredba za vještačenje Kantonalnog tužilaštva Zenica od 20.05.2022. godine, Nalaz i mišljenje hemijskog vještačenja Odsjeka za hemijsko-toksikološka i fizikalna ispitivanja, istraživanja i vještačenja Federalne uprave policije Sarajevo broj: 09-18/2-03-5-1455 od 27.01.2023. godine, fotodokumentaciju PU IV PS Tešanj broj: 85/22 od 29.04.2022. godine i 20.07.2022. godine i izvod iz kaznene evidencije za osumnjičenog J. O. PU Doboj od 10.07.2024. godine, pa je sud, cijeneći izvedene dokaze pojedinačno i u njihovoj međusobnoj vezi utvrdio da je optuženi počinio radnje opisane u dispozitivu ove presude, odnosno da je neovlašteno kod sebe radi prodaje držao 5 pvc paketića svijetlo žute praškaste materije neto težine 0,640 grama, 0,565 grama, 0,679 grama, 69,097 grama i 73,228 grama za koju materiju je vještačenjem utvrđeno da sadrži psihotropnu supstancu „Amfetamin“, poznatija kao opojna droga Speed, zatim 8 pvc paketića biljne materije neto težine 179,665 grama, za koju materiju vještačenjem utvrđeno da sadrži psihoaktivnu komponentu „Tetrahidrokanabinol“ (THC) poznatija kao opojna droga Marihuana, te 50 tableta žuto-zelene boje ukupno neto težine 19,110 grama za koje tablete je vještačenjem utvrđeno da sadrži psihoaktivnu komponentu Metilendioksimetafetamin (MDMA), poznatija kao opojna droga Ecstasy, te da je optuženi bio svjestan da se radi o materiji čije se posjedovanje i promet zabranjuje a istu je držao kod sebe radi prodaje.

Uvjerenje suda je da je do priznanja krivnje došlo sa razumjevanjem, te da je optuženi svjestan svih posljedica i obaveza koji proističu iz priznanja krivnje, te da postoji dovoljno dokaza o krivnji optuženog, pa je sud i prihvatio priznanje optuženog.

Budući da je odredbom člana 3. tačka 1. Zakona o sprečavanju i suzbijanju zloupotrebe opojnih droga (Sl. Glasnik BiH br. 8 od 07.02.2006. godine) propisano da je opojna droga svaka tvar prirodnog ili umjetnog porijekla koja je uvrštena u popis opojnih droga u skladu s međunarodnim konvencijama o nadzoru nad opojnim drogama ili na temelju odluke nadležnih tijela u Bosni i Hercegovini, a da su odredbom člana 4. istog Zakona propisane opće zabrane, odnosno da je posjedovanje opojnih droga i psihotropnih supstanci dozvoljeno samo u medicinske, veterinarske i naučne svrhe, pa pošto je Amfetamin listom opojnih droga, psihotropnih tvari i biljaka iz kojih se može dobiti opojna droga i prekusura u tabeli II opisa psihotropnih tvari pod rednim brojem 1 proglašen za psihotropnu tvar, te biljni materijal koji je pronađen kod optuženog sadrži psihoaktivnu komponentu tetrahidrokanabinol (THC), te predstavlja opojnu drogu Cannabis, tablete koje su pronađene kod optuženog sadrže psihoaktivnu komponentu Metilendioksimetamfetamin (MDMA) a Listom opojnih droga, psihotropnih tvari, biljaka iz kojih se može dobiti opojna droga i prekusora („Službeni glasnik BiH“ broj 8/06) metilendioksimetamfetamin (MDMA) je proglašen psihotropnom tvari u Tabeli I, Popisa psihotropnih tvari pod rednim bojem 12, to je optuženi i postupao suprotno odredbama člana 4. u vezi sa članom 19. i 20. Zakona o sprečavanju i suzbijanju zloupotrebe opojnih droga.

Kako krivično djelo „Neovlaštena proizvodnja i stavljanje u promet opojnih droga“ iz člana 238. stav 1. KZ FBiH čini onaj ko neovlašteno proizvodi, prerađuje, prodaje ili nudi na prodaju ili radi prodaje kupuje, drži ili prenosi ili posreduje u prodaji ili kupovini ili na drugi način neovlašteno stavlja u promet materije ili pripravke propisom proglašene opojnim drogama, to se u radnjama optuženog stiču sva bitna obilježja krivičnog djela „Neovlaštena proizvodnja i stavljanje u promet opojnih droga“ iz člana 238. stav 1. KZ FBiH, pa kako je optuženi bio svjestan svog djela i htio njegovo izvršenje, a ne postoje okolnosti koje isključuju odgovornost optuženog to je sud optuženog oglasio krivim i osudio kao u izreci ove presude.

Prilikom odlučivanja o vrsti i visini krivično pravne sankcije, sud je cijenio na strani optuženog sve okolnosti koje utiču na odmjeravanje kazne. Od olakšavajućih okolnosti sud je našao da optuženi priznaje izvršenje djela koje mu se stavlja na teret, da je priznao krivnju, protek vremena od dana izvršenja krivičnog djela, a od otežavajućih okolnosti da je osuđivan, i to presudom ovog suda broj 39 0 K 070117 23 K , pravosnažna dana 19.04.2024 . godine, za krivično djelo iz člana 239. stav 3. KZ FBiH na kaznu zatvora u trajanju od 3 mjeseci uslovno jedna godina, te u Njemačkoj 3 puta novčanom kaznom i uvjetnom osudom, sud je optuženog osudio na kaznu zatvora u trajanju od 1 godine, jer je uvjerenje suda da se jedino sa bezuvjetnom kaznom zatvora u konkretnom slučaju može ostvariti svrha kažnjavanja predviđena članom 42. KZ FBiH.

U smislu odredaba člana 78. KZ F BiH i 238. stav 4. KZ FBiH, sud je izrekao mjeru sigurnosti oduzimanja opojne droge Speed ukupno neto mase 144,209 grama, Marihuana 179,665 grama i 50 MDMA tableta Amfetamin ukupo neto mase 19,110 grama i odredio da količina preostala nakon vještačenja (144,012 grama, 179,286 grama i 18,356 grama) se ima uništiti, te se naređuje Komisiji za uništenje opojne droge formirane pri Vijeću Ministara BiH da odmah po prijemu naloga za izvršenje mjere sigurnosti a najdalje u roku od mjesec dana od PU IV PS Tešanj oduzme navedenu opojnu drogu preostalu nakon izvršenog vještačenja, te istu uništi u skladu sa Pravilnikom o čuvanju i uništenju oduzete opojne droge, psihotropnih tvari, biljaka iz kojih se može dobiti opojna droga i prekursora.

U smislu odredaba člana 202. stav 1. ZKP-a sud je optuženog obavezao na plaćanje sudskog paušala u iznosu od 100,00 KM a u roku od 15 dana od dana pravosnažnosti ove presude.

PRAVNA POUKA:

Protiv ove presude dozvoljena je žalba
Kantonalnom sudu u Zenici u roku
od 15 dana od dana prijema presude.

SUDIJA

Bekrić Hidajeta